

弘

簡

錄

弘簡錄卷二百三十九

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金庶官一

傅慎微 趙鑑

李上達 李瞻

趙元 任熊祥范承吉田漸

盧克忠 劉敏行

高昌福 韓錫

李偲 劉敏柔盧孝儉

牛德昌 丁睥仁

高德基 子錫張亨

劉煥

劉瓌 邵儼

張大節 子巖叟

賈揚庭 巨擘 康元弼 焦旭

劉仲洙 女劉氏

馬百祿 揚伯元

李完

郝谷

孫德淵

孟奎

郭傑 武都

韓勣忠

張煒

裴滿亨

張發盧庸

王擴

趙重福 王浩

傅慎微字幾先其先秦州沙溪人徙建昌又遷長安登宋末進

士性純質篤古喜談兵累官河東經制使婁室定陝西率衆迎
戰兵敗被獲元帥宗翰愛其才學弗殺羈置歸化州希尹收居
門下宗弼復取河南用爲陝西經畧使尋權同州節度使事明
年大旱民饑擢爲京兆鄜延環慶三路經濟使許以便宜募民
入粟得二十餘萬石立養濟院餉餓者全活甚衆改京兆尹同
知權陝西諸路轉運使復修三白龍首等渠以溉田募民屯種
貸以牛及種子民賴其利轉中京副留守察廉改忻州刺史累
遷太常卿除定武軍節度使移靖難軍柝用事臣得藉保衛救
免大定初遷禮部尚書同修國史卒于官年七十六生平博學
喜著書嘗奏典三金鏡錄一百卷

趙鑑字擇善濟南章丘人宋建炎二年登第調廬州司理參軍
以江淮方用兵棄官還鄉齊國建除歷城丞轉長清令劇邑難

治政跡甚著劉豫召見遷直秘閣提點本路刑獄兼提舉涇原
路弓箭手戒曰邊將多不法可痛繩之原州守將武悍自用易
其年少鏗發露其姦賊坐免郡縣聞風無敢犯齊廢除知城陽
軍改山東東路轉運副使攝行臺左司郎中時宰欲用故宋宦
者樞都監鑑言宦官談國汴人視爲寇讐付之以權將失人望
遂不用毋憂解職天德初起爲濟州刺史移涿州海陵召入朝
應對失旨遣還俄除知火山軍以病免大定初起知寧海軍秋
禾方熟民以蠶生請鑑出城行視蠶乃自死再遷鎮西軍節度
改河北西路轉運使致仕卒

李上達字達道曹州濟陰人在宋以舊補官累東平府司戶參
軍撻懶取東平供給軍須號稱辦治入齊爲吏部員外郎攝戶
部事劉豫假以古法俾民樂歲輸多歎歲寡取然收歛之時多

不實輸官亦不肯盡信徒起告訐獄訟紛紜公私苦之因論其
弊定爲五等之制會廢齊國隨河南地入宋後金復取齊地仍
爲大名同知遷陝西河南兩路按察官遇關陝蒲解汝蔡民餓
輒以便宜發粟賑濟累陞山東西路轉運使到官再期稅錢比
舊增三十餘萬貫戶部以其法頒之鄰路爲人長於吏事能治
繁劇滑吏不能欺所至稱之卒官年六十一

李瞻薊州玉田人遼天慶二年進士爲平州望雲令張覺據州
叛以瞻從事宗望復平州覺亡去城中復叛瞻踰城出降其子
不能出遂爲賊害宗望承制拜爲興平府判官天會三年遷大
理少卿從南伐爲漢軍糧料使宋人請割河北三鎮以瞻與禮
部侍郎李天翼安撫河北東西兩路略定懷濟衛等州衛湯陰
等縣七年知寧州累遷德州防禦使瞻爲政寬平民懷其惠相

率詣京師請留者數千人貞元三年遷濟州路轉運使收忠順軍節度使正隆末盜賊蠡起增築城壘大爲備禦蔚人賴之以安大定初卒于官

趙元字善長涿州范陽人與任熊祥范承吉田灝俱登遼天慶八年進士元仕至金部員外郎遼亡郭藥師辟掌機宜文事歸朝復辟劉彥宗樞密院令史天會問爲薊州同知有賊殺人橫道官吏圖視莫知誰何路人聚觀甚衆元指田中釋耒而來者曰此賊也叱左右縛之果伏僚吏問其故答曰偶得於眉睫間耳會立磨勘格以元嘗仕於宋宣和除名齊國廢選補行省兵部郎中隨徙大名邢州宗弼再取河南以元攝戶部事賦調兵食悉皆倚辦天眷三年轉行臺右司員外郎有囚殺人當死行臺欲宥之元不從反覆數四竟不能奪俄改左司攝吏部事歷

十餘年吏事明敏宗弼深知之凡有事上相府必問曾經趙元否其所見重如此久之同簽汴京留守事改同知大名尹察廉遷河北西路轉運使歷彰德武勝等軍節度使以老致仕卒于家任熊祥字子仁後唐宰相圖孫睿隨石晉北遷遂爲燕人初爲樞密院令史隨燕地歸宋授武當丞宋法凡新附官不許濫務言於郡守楊皙止給半俸以養親皙喜其廉會復取均房州仍歸朝依舊任令史攝院事西京留守高慶裔嚴勵無敢忤其意者獨未嘗阿意事之後杜克劉善同知燕京行省異論悉爲折衷俄歷深磁二州刺史開封少尹行臺工部郎中汴京留守同知天德初爲山東東路轉運使改鎮西軍節度使詔主會試遷翰林侍讀學士未幾致仕太定初起爲太子少師特窩幹竊號用兵不息徐進說曰陛下以勞民爲憂用兵爲重莫若招

以恩信上問孰可使者乃自請行上憫其老七年復致仕遂卒于家生平事母以孝聞母沒時年已七十不食三日人皆稱之

范承吉字寵之自幼好學弱冠季盜起未嘗廢書授官校書郎爲余源令歸朝爲御前承應文字天眷初遷殿中少監從攻太原遷少府監宗翰克宋所得金珠命司出入無毫髮欺及遷領軍載書史而已尋遷昭文館直學士知絳州使吏遍諭有因軍典爲將士所掠而逃歸者承吉皆令自贖白元帥府凡數千人盡贖爲良貧無貲者貸以公錢六年改河東北路轉運使時承宋弊民賦繁重輒爲經畫立法簡便所入增十數萬斛官旣稱足民亦有餘歷同知平陽尹西京副留守河東南路轉運使改同簽燕京留守事順天軍節度使屬地震壞民廬舍匠以爭先營葺過取其直分命官屬董之承吉先後以次無間貧富賴

以省費歷鎮西秦寧二軍行臺禮部尚書復鎮順天奚卒散居
境內爲盜一繩以法不爲少貸皆畏懼不敢犯貞元二年以光
祿大夫致仕卒年六十六 田頔字默之興中人歷官金部員
外郎權歸德軍節度使舉四州叛圍歸降加都官郎中仍權節
度事遷知真定府招降齊博游貴等賊衆五十餘人已而貴復
叛去遣博僞叛從貴因令博伺間殺之降其黨與賊巢悉平遷
行臺左丞改節彰德軍時新定力役因蠲籍之半以上故相之
緡賦比他州獨輕徙河北東路都總管同知改同簽燕京留守
司事民遮留不得出易服夜去改河東南路轉運使尋陞絳陽
軍節度使居三年以疾請謝不允移鎮振武軍入爲刑部尚書
請老卒于家

盧克忠貴德州鳳集人幹魯克東京高永昌尚攬遼陽因走詣

韓魯營來降遂與渤海人撻不也追獲永昌收國二年授世襲謀克其後定燕伐宋皆與有功歷除登瀛二州刺史天德間爲保大軍節度同知有軍卒數人自綏德過邢城道宿民家至夜主人被劫有司執卒繫獄榜掠誣服克忠察其冤遲疑不肯卽署未幾果獲真盜釋之大定二年除北京副留守民方艱食下令平價凡有蓄積悉令出糶賴無捐瘠之患轉陳州防禦至靖難軍節度使致仕卒

劉敏行平州人天會三年登第除校書郎累遷肥鄉令歲大飢盜掠人爲食諸縣老弱避入城郭不敢耕植農事皆廢畝荒蕪敏行白于州借軍士護民出耕多張旗幟爲疑兵往來巡邏暮復闕入由是盜不敢犯而耕稼滋殖轉高平令縣城壞久不修大盜橫恣不能禦爲捐已俸倡率僚史出錢僱役百姓欣然

從之凡用二千人繕治已完賊至鄉村百姓入保遂不能犯遷河北東路轉運使致仕卒

高昌福中都宛平人父履遼御史中丞致仕太宗聞其名召見未及而卒昌福登天會十年進士補樞密院并辟元帥府令史皇統初宗弼治汴凡獲人疑似者輒目爲謀殺之昌福獄得實釋去甚衆許州都統韓常嚴酷好殺遣吏送囚於汴囚道亡自度不免欲盡殺以滅口亦爲窮竟其狀免死者十七八諸吏遂悉欲搆害之會帥府選人偵宋兵動靜卽遣以行昌福不辭盡得虛實還報出師有功除震武軍節度副史轉行臺禮部員外郎天德間復改絳陽軍節副入爲兵部員外轉河間少尹世宗卽位上書陳便宜事上披閱再三因謂侍臣自此可以識內外官之優劣不然朕何由知之三除東京留守同知治稱最遷山

東西路轉運使拜工部尚書彰德軍節度使累遷河中尹致仕卒

韓錫字難老兵先自祁津徙薊之漁陽祖胎息遼宣徽北院使父秉休歸朝領忠正軍節度使錫以庶補開門祇候天會南伐從軍中掌禮儀俄以母老廼就監差久之授神銳軍都指揮使入爲宮苑使天德元年擢工部員外郎領燕都營繕特賜朝服榜進士及第四遷戶部侍郎同知宣徽院事錫不謝杖之二百奪所授官俄因母喪起復舊職付金犀一銀犀十籍山東水手部船三百會蕪保衡於廣陵適保衡敗還喪船過半令錫補足之時水淺船不得進衆懼詰責稍亡錫諭以進保法嚴逃將安往縱一身偶脫如妻子何衆悟稍止奔赴遼陽詔復前職大定二年授河間府同知時皇族居彼者縱甚上引見香閣令悉觀

之以法錫下車宣布詔旨後無敢有撓政害民者累遷孟州防禦絳陽軍節度使改知濟南府告老明昌五年卒年八十三

李愬字子友定州安僖人與劉徽柔盧孝儉俱登天眷二年進士第調遼山簿累官戶部主事母憂起復舊職除河東南路轉運同知大定初改中都路都轉運同知秩滿例陞世宗以戶部財用出入難其人愬由權知登聞檢院遷戶部侍郎諭以卿非舊勞資叙尚淺勿因循歲月若不自勉必不汝貸及聞愬每朝會與尚書高德基屏人私語怪問右丞石琚愬何如人琚曰亦幹事吏耳乃改爲北京留守同知轉沂州防禦使戶部取民藁秸備警急用妨農失業具奏止之轉運司牒郡輸粟胸山急調夫數萬久雨泥淖輓運不前愬遣吏刺取見樹可支半歲轉廉運司請緩其期毋困百姓會有令街陌問罷收徼直民所作屬

一切撤毀他郡奉法盡令撤去偃獨使巷道增正撤治前却不一不爲過甚小民便之改陝西西路轉運使卒 劉徽柔字

君美大興安次人歷真定樂城二簿洪洞令開避軍節度寧書記性明敏善聽斷有縣人楊遠利姪財而殺之誣稱夜雨屋壞壓死號訴哀切熱視而笑卽叱付獄其人立伏曰公神明也不致延死遂寘於法秩滿縣人遮戀不得去爲立生祠刻石頌德正隆二年入爲大理評事遷司直大定二年轉河東南路轉運同知察廉第一改知平定軍陞大理少卿七年復出知磁州爲南京留守同知十年遷中都路轉運使卒于官 盧孝儉宣德州人初調憲州軍事判官補尚書省令史累官太原少尹大定二年陝西用兵調發本路稅粟赴平涼充軍實期甚嚴迫孝儉輒變易金帛輕賫馳至用省而不失期并人稱之用廉進官二

階遷同知廣寧尹會大饑民多流亡而僧有積粟留其一歲之用餘使平價市與貧民累遷山東東路轉運使爲人素福躁與同僚王公謹失歡不知其子私用官帑旣而改河北西路公謹乃發其事孝儉徐聞被逮莫測所以行至章丘自縊死

牛德昌字彥欽蔚州定安人父鐸遼將作大監早卒母教之學有勸以就蔭者母以遺命不從與丁晬仁高德基俱登皇統二年進士調礬山簿遷萬全令屬蒲陝荐饑羣盜充斥城門晝閉到日卽縱百姓出入榜曰民苦飢寒剽掠鄉聚以供旦夕之命甚可憐憫能自新者一不問賊皆感激解散縣境以安府尹王伯龍嘉之禮待甚厚熙宗遣廉察使循行四方上其治行累官刑吏二部侍郎中都路都轉運使廣寧太原二尹卒贈中奉大夫 丁晬仁字藏用大興府宛平人曾祖爽祖惟壽父筠筠以

吏補州縣所至有聲後致仕杜門不出鄉里有鬪訟者不之官就釣質焉廉仁冲澹寡欲讀書外無一他好避遼季亂間關道塗未嘗釋卷初調武清縣丞經兵革後學校盡廢爲召邑中俊秀教之欣然樂從俄調磁州軍事判官以廉攝守事遷和川令會前令罷更阿縱羣小而罷廉仁至卽申明法禁遂皆屏息避走他縣有旅禘者最强悍心亦畏服以刀斷指誓不復犯凡租賦預與百姓爲期辦先他邑擢北京推官再遷大理司直以憂起復大定三年除定武軍節度副使闕官攝政獄無留訟改大理丞吏部員外郎陞刑部郎中復轉戶部坐尚廐局官私用官芻違格解職左授忻州刺史祁本定武支郡士民相率歡迎尋轉西京留守同知首興學校以明養士之法擢陝西西路轉運使二十一年卒于官

高德基字元復遼陽渤海人爲尚書省令史海陵居相位專復
自用人莫敢拂其意德基每與之詳辨及篡位諭旨卿公直果
敢委以南京行省勾當未行欲都燕京命攝行臺都省事改攝
右司轉中都路都轉運副使入爲戶部員外至耶中正隆三年
與中丞李鐸刑侍蕭中一俱提點南京營造宮室世宗卽位陞
開封尹同知廉察治狀不善左遷北京都轉運同知大定三年
秋土河泛溢水將壞城命開長樂門疏入御溝以殺其勢不能
爲害遷刑部侍郎七年改中都路都轉運使九年轉刑部尚書
有犯罪當死者宰相欲從末減德基爭曰法無二門失出猶失
入也不從上是其議因召諸尚書諭以自朕卽位以來因政事
與宰相爭是非者德基一人而已自今議上不合卽具以聞尋
爲宋主生日使還日宋於禮物外附進臘茶三千勝不親封署

責以非姪獻叔禮。却之。十一年改戶部尚書。上疏乞免軍須房稅等錢減農稅及鹽酒等課未報坐取悅宰執近臣折給俸粟增高市價多出官錢幾四十萬杖決降爲蘭州刺史卒年五十四。子錫字求之以廢補官積勞調滿州酒使課最遷萍鄉令察廉進遼東路轉運度支判官太倉弁法物庫使兼尚林署直長提舉都城歷北京遼東轉運副使同知南京路轉運使貞祐初累遷河北東路按察轉運使城破自投城下而死。

張亨字彥通大興泐陰人皇統六年登第調樊山縣丞以廉幹聞授弘州軍事判官歷鉅鹿宜川二縣令大定二年補尚書省令史除大理司直累遷左司郎中戶吏二部侍郎擢中都路都轉運使坐失舉草場鄧汝霖盜草事解職起授戶部尚書世宗嘗問平章張汝霖亨與馬惠迪人才孰優對曰惠迪爲人雖正

於事不敏亨更才極高上曰如汝父濟於事明敏少有及者但臨事多利若無此過誠難得之賢相也時車駕東巡上京費用百出自遼以東距都四千里泉貨甚少計司患其不給欲輦運以支調度率三而致一亨奏不獨枉費國川兼且重勞民力乃剗會便法使行旅便於囊橐國家省於轉輸詔從之俄因奏事脫畧出爲絳陽軍節度使復語宰臣僕人三品以上官常少得人如張亨頗爲衆議所歸近令補外可惜也章宗卽位方重九路提刑擢爲河東南北路提刑使兼勸農採訪事訪其利病係爲十三事以聞上嘉納之明年遷南京路轉運使轉歸德府事致仕泰和二年卒年七十八亨才識強敏明達吏事每存大體略苛細終始咸有可稱

劉煥字德文中山人宋末兵起城中乏糧煮糠覈而食時煥尚

少自飲清者以濃厚者供母鄉里異之稍長就學天寒擁糞火
讀書不怠登天德元年進士調任丘尉每規正縣令貪汙秩滿
令持杯酒謝曰以尉廉慎使我獲考後調中都市令樞密使僕
散忽土家有條結工牟利不肯從市役執繫之忽土來召煥不
往乃暴工罪竟從笞罰鄉人石琚始以煥棄簡就煩疑爲圖利
不悅至是以廉稱始加禮重升京兆推官再遷北京巡警使所
蒞多惡少捕其尤者杖之戒曰孝弟敬慎則爲君子暴戾隱賊
則爲小人自今毋徃於故習國有明罰吾不得私衆由是憚毋
敢犯者召爲監察御史父老數百臥車挽登欲留不得復攝戶
部員外郎朝廷患代州錢色惡類鐵煥奏歷代錢寶純用黃銅
自代州取青與黃銅四六雜糅務省費而工易就必欲爲天下
利宜純用黃銅得數少而利遠其新錢已流行者宜驗數輸納

準換從之再遷管州刺史嘗老復疏其著蹟十一事請節鎮請
留後升鄭州防禦使轉北京留守同知世宗幸上京所過州郡
大發民夫治橋梁馳道以希恩賞惟煥所部平治端好而已上
嘉其意遷遼東路轉運使卒

劉璣字仲璋益都人與邵儼張大節俱登天德三年進士大定
初璣爲大常博士改左拾遺兼許王府文學俄除漕運同知奏
言漕戶顧直太高虛費官物宜約量裁損若減三之一歲可省
官錢一十五萬餘貫上覽其言以爲盡心公家不加陞賞無以
勸來者賜錢三千貫遷戶部員外郎又條上便宜數事極盡官
錢利害上稱璣曰前後戶部官往往偷延歲月如璣者不可多
得卿等議其可者行之尋擢濰州刺史徙知濟州未幾遷北京
留守同知坐曲法放免奴婢訴良者左降管州刺史參政程輝

言其執強跋扈嘗追濟南府官錢委曲生意害及平民不宜再用明昌二年入爲國子司業轉祭酒尋擢太常卿以昏蕩不任職罷承安二年卒年八十二 鄧儼字子威懿州宜民人大定中歷左司員外右司郎中復轉左司掌機務者數年世宗悅其敏睿嘗語宰臣人言鄧儼用心不正朕視其奏事心識甚明在太府監心亦向公宰臣因奏儼達事機有心力特命爲宋國信使還擢戶部侍郎翌日復言吏部掌銓選儼性通練可用此人因改命焉累遷中都路都轉運使明昌初爲戶部尚書上命議所以使民棄末務本以廣儲蓄其道何由奏言今之風俗競爲侈靡宜定立制度使貴賤上下衣冠車馬室宇器用各有差等裁抑婚姻喪祭過度之禮罷去鄉社追逐無名之費用度有節則蓄積日廣上嘉納之除授歸德知府乞致仕上因其願許

之復資緣求進上以問平章完顏守與對曰儼有才力臨事不後於人第以謀身爲心多務自便耳儼前乞致仕甚合衆議今使復列于朝恐風化從此而壞上以爲然遂不復用

張大節字信之代州五臺人初調崞縣丞改東京市令世宗判留務甚愛重之海陵修汴京命領其役遼陽變起不爲趨附隨例補尚書省令史權秘書郎大理司直至左警巡使因杖殺豪民解職未幾起授洛州防禦同知入爲太府丞工部員外郎盧溝水壩安次丞詔護視堤成權修內司使推排東京路戶籍人服其平進工部郎中與吏部員外郎麻珪泣阜通監鑄錢積銅皆竄惡議徵民所給直大節獨以爲有司受納之過於民何與事間得免就改戶部郎中廉得定襄退吏誣縣民匿銅者十八村反罪坐之民斲石以頌召爲戶工二部侍郎世宗東巡徙大

府監從行支應皆籍以辦尋爲宋生日使還授橫海軍節度使
過闕謁謝東宮頌宗撫慰良久曰萬事惟中可也因榜其公堂
曰惟中郡境有巨盜久不獲因設方略擒之河決而東相宜繕
堤水不爲害章宗卽位擢中都路都轉運使言河東賦重宜減
議者不同賴以他路田賦贖之遂命減四乞休優以郡郡使知
太原府近郭有男子被殺聞其妻哭聲不哀召而審之果獲姦
夫。人以爲神西山有晉叔虞祠舊以菴錢輸公使車悉還之令
給營繕遷知大興府綽有能名閔玘復移廣寧轉震武軍節度
使部有銀冶議以官權爲便獨奏山澤之利當與民共宜明示
約束于民授地輸課則游手者有所資當官者無所損斯爲兩
便上從之世宗嘗語宰臣大節賦性忠實果於從政惜乎用之
太晚承安五年致仕卒年八十大節爲人廉勤好學能勵勉後

進所學得于任侂待侂子如親而加厚又善弈棋當世推爲第一與張景仁相埒子巖叟字孟弼大定十九年登第調夏州司候雄州觀察皆爲判官俄補尚書省令史除大理評事再遷監察御史河東北路轉運同知中都路都轉運副使入爲刑部員外郎告歸侍親特除忻州刺史以便祿養父憂起復大理少卿河北東西大名等路按察轉運副使累遷刑部侍郎兼楚王傅至太常卿兼國子祭酒大安三年元兵來攻議塞諸城門巖叟抗議以爲城所以衛民人所以完城與其任城而不任人莫若選兵擇將背城疾戰時以爲宜尋除鎮西定國二軍節度使貞祐二年復改昭義沁南年老不任邊要致仕退寓洛陽卒

賀揚庭字公叟曹州濟陰人與巨構俱登天德三年經義進士調范縣簿兼尉籍有治聲大定十三年山安肅令補尚書省令

史授沁南軍節度副使入爲監察御史歷右司都事戶部員外郎侍御史世宗喜其剛果諭以汝性曠直敢爲異時不習詞賦故中第者少近年河南山東人中第者多殆勝漢人爲官性姦臨事多避難俄以廉能遷左司郎中進官二階改刑部侍郎章宗卽位歷授山東東西路轉運并提刑使素性疾惡纖介不少容明昌二年除洺州防禦使遇歲歉民饑諭凡蓄積家盡出所餘以糶餒者獲濟人爲立石頌德改陝西西路轉運使以能幹稱有疾致仕卒年六十七 巨構字子成薊州平谷人幼篤學年二十登第爲信都丞察廉轉石城令大定中詔與近臣同經營香山行宮及佛舍近臣私謂構欲行舉薦行將大任構辭之尋補尚書省令史授振武軍節度副使改同提舉解鹽司事以課增入爲少府監丞遷如登聞檢院兼都木少監有司奏右司

郎中段珪卒上言其人甚明正可用如巨構但每事委順殊乏剛鯁燕人自古忠直者鮮遼兵至則從遼宋人至則從宋本朝至又從本朝雖屢經遷變未嘗殘破其俗詭隨有自來矣南人勁挺敢言直諫者多前殺一人後復一人進諫甚可尚也二十五年除南京副留守章宗爲皇太孫上語之曰佐貳之任貴能與長官辨正恐此人不能爾若任以長官必有可稱卽位擢橫海軍節度使所治以興滯稱承安五年致仕卒爲人廉慎守法外淳質而內明悟寬厚寡言性尤恬退故人旣貴不復往來遺以書裁答寒溫而已其在考功籍始終無過

康元弼字輔之大同雲中人幼敏學善屬文與焦旭俱登正隆二年進士調汝陽縣簿改崇義軍節度判官由垣曲縣令補尚書省令史累遷河北西路轉運同知召爲大理丞大定二十七

年河決曹濮城多墊溺遣往相視其地如益請命於朝徙築於北原曹人賴焉尋出爲弘州刺史閱歲授大理少卿先是衛城亦爲河塿增築蘇門以寓州治水旣退民不樂遷欲復歸衛仍遣元弼按視還言治故城便遂復其舊久之轉秘書少監兼著作郎出爲通州刺史兼領漕事章宗立尊孝懿爲皇太后以元弼舊臣詔充副衛尉再轉大理卿以喪去起復爲刑部侍郎兼鄆王傅遷南京路轉運使承安三年致仕卒 焦旭字明銳沃州柏鄉人初調安喜縣簿轉大興令以幹材稱攝左營巡事因杖親軍百人長改其鄉令石瑒薦爲右營巡使旭自信剛果不避權勢部民有訴從良因無文據仍付本主其人訴於御史亦不從劾削兩階出爲大名府推官尋授右三部檢法司正中丞李晏薦旭剛正可任以爲監察御史章宗初卽位劾奏太傅克

寧右丞相襄不當請車駕出獵上以爲小事不須究治慰而遣之因爲罷行尋改侍御史遷都水監以治河防勞進官一階授西京路轉運使卒旭性警敏練達時政世稱能吏

劉仲洙字師魯宛平人大定三年登第歷龍門主簿香河酒稅使再調深澤令縣近滹沱河秋成時水忽暴溢極力覆壑竟以無害有盜夜發居民震驚率縣卒生執其一餘衆遂潰旦日掩捕皆獲尋察廉能陞河北西路轉運司判官入爲刑部主事以才行見稱遷右司并吏部員外郎口語甚訥世宗語宰臣人有言敏辯而庸常不正者有言拙訥而才智通達存心向正者右丞張汝霖曰人之若是者多矣願陛下深察之二十九年出爲祁州刺史以六善爲教民化之章宗卽位除中都西京等路提刑副使上書力辯先年田穀等之寃帝從之得復官爵解其黨

禁明昌二年授并王傅兼同知大同府事尋改平陽移德州防禦使轉運郭非傑節度李晏皆舉以自代陞爲定海軍節度使歲饑表請開倉未報先爲賑貸勅諭以贖又請代兄仲淵罪責石州朝廷義而不許久之年老乞休累表方聽泰和八年卒年七十五仲洙性剛直果於從政尤長治民所在皆有功迹以能更稱女嫁許古貞祐初古仕于朝留妻并二女于蒲大兵圍之劉泣語女曰兵勢危迫城不可保若一旦被驅汗及乃父不若死以自全遂咸自縊事聞追封劉氏貞潔郡君長女諡定姜次肅姜以其事付史館

馬百祿字天錫通州三河人父柔德天會初中第累遷翰林修撰坐田穀黨免官迨黨禁解復召用百祿幼志于學事繼母以孝聞與楊伯元俱登大定三年詞賦進士調武清縣簿轉龍山

令在職清白有治跡就改權貨副使遷平陽府判官入爲國子
博士升北京路轉運同知委錄南北路刑獄所至無冤召爲戶
部員外郎與河北轉運同知季京推排中都等路物力明昌初
遷耀州刺史吏民畏愛提刑司以狀聞授韓王傅安武軍節度
同知俄改兼興平軍同知復舉廉升孟州防禦使再遷南京路
提刑使御史臺言其剛直能幹轉知河中府承安四年致仕卒
諡曰貞忠 楊伯元字長卿開封尉氏人初調鄆城主簿升楡
次令召爲大理評事累除定海軍節度副使察廉超授河東北
路轉運同知入爲刑部員外郎以憂免起爲遼州刺史明昌元
年移涿州久之擢工部侍郎四遷安武軍節度使泰和三年致
仕卒伯元在官以才幹多被委任凡兩爲推排定課使累爲審
錄官人稱其平每有疑獄必專遣決明辯多中理賜諡曰達

李完字全道朔州馬邑人經童出身復登詞賦進士調澄城縣簿有遺愛民爲立祠察廉遷定襄令召補尚書省令史世宗選能吏八人拔行天下廉問縣令能否完卽其一明昌初爲監察御史故事六部令史年久者補臺令史皆用雜流吏以同類莫肯舉劾世宗從太師張浩奏純取進士完又乞以三品子孫及終場舉人委臺官辟川上納其言俄擢尚書省都事出爲橫海軍節度同知河間府治中提刑司薦舉完明習法律有治劇材軍民無間語陞沁州刺史仍以璽書褒諭遷廣寧府同知有遼濱民崔元入城飲歸爲舟師所殺投尸水中有司執同飲者誣服繫獄廉得其賊抵罪免誣就陞北京臨潢路提刑副使永安二年遷陝西西路轉運使終南京路按察使爲人長於吏治所至姦惡屏迹民皆便之

鄒谷字應仲密州諸城人素有吏才大定十三年登第累官陝西河南訪察及定課皆稱職遷滯王府文學俄除曹州同知歷北京臨黃提刑判官濟南彰德府治中入爲刑部主事轉大理寺丞左司都事李炳素因疾惡人不能容令史周昂誣以乘醉詈之爲奴命左右撻其衣欲杖之陳訴于朝及議差接送伴宋使官事當奏問炳謂口舉兩人卽是何用奏爲衆議當科違制谷謂口舉兩人一時之言當杖贖昂衣欲加杖當決二十乃從衆議後陞吏部郎中河中按察副使歷沂州防禦定海秦寧軍節度使泰和六年致仕貞祐初卒

孫德淵字資深典中州人大定十六年登第調石州軍事判官涑水丞察廉遷沙河令有盜桑者主逐之自傷其足誣爲所刺而密若逐捕而傷者必在後今在前乃自刺也遂引服父曼去

民爲刻石祠之起復北京轉運司都勾判官薦以剛正能幹可任繁劇遷中都左警巡使爲監察御史山東東路轉運副使累官大理丞兼左拾遺母憂服除轉恩滕二州刺史入爲右司郎中歷河間同知大興治中同知府事大安初改河北西路按察轉運盤安昭義兩軍節度使路州破被執沙河舊民尚拜于前密襲德淵由是得脫貞祐二年拜工部尚書攝御史中丞時山東乏兵食有司請鬻恩例舉人居喪者亦許納錢就試德淵奏此大傷名教遂寢尋致仕御史許古論其忠亮明敏可以大用願朝廷復取必能建明以利國家宣宗嘉納未及用而卒

孟奎字元秀遼陽人大定二十一年登第調黎陽主簿母憂服闋調淄州軍事判官遷及縣令察廉改定典令補尚書省令史從參政馬琪塞澶淵決河改中都左警巡使平章完顏守貞禮

接士大夫在其門者號冷巖十俊奎其一也改都轉運并上京等路提刑皆爲判官按囚速頻路有弊丹判余里也嘗發驛使抵同名者繫有司獄奎讞而出之既而果獲其犯遷西京路轉運同知充鎮寧行樞密院宣差規措所官給軍用改發河東南北路按察司事武州刺史上言親民之寄部選頗輕使武夫計資而得權歸胥吏自今每縣宜參用士人紀綱其事未幾改曹州刺史再調中都路都轉運同知歲旱詔審錄冤獄多所平反大安初除博州防禦使凡屬縣事應赴州者不得泊於逆旅以防吏姦人皆便之改山東東西路安撫副使遷北京臨潢等路按察轉運使轉行六部侍郎宣差都提控奏監軍完顏訛出虛造功狀免其官貞祐初以疾卒諡莊肅

郭俛字伯有澤州人與武都俱登大定二十二年進士詢長子

主簿萊州觀察判官萊陽縣令補尚書省令史知管差除進大理司直母憂起復太常博士左司都事御史臺舉僕及前應奉翰林文字張檄刑部主事抹撚居中通事舍人完顏合住弘文校理把掃合吏部架闔管勾烏古論和尚尚書省令史溫廸罕思敬皆才幹可用詔各升一等遷僕平陽府治中檄國子博士居中大理司直合住侍儀司令掃合同知弘文院事和尚利涉軍節度副使思敬定武軍節度同知久之僕召為登聞鼓院同知兼秘書丞遷禮部郎中陟州刺史同知其定府事上言每季合注巡尉官吏刑兩部斟酌盜賊多寡處選注詔議行之改中都西京按察副使遷國子祭酒溱和伐宋克宣差山東安撫副使又改宣撫副大安中歷遼東陝西東路按察轉運使改中都路都轉運使泰定軍節度使貞祐三年罷按察司仍充本路及

河北西路轉運使行六部尚書致仕元光二年卒 武都字文伯東勝州人調陽毅主簿遷商水令縣素多盜嘗縱火行劫并椎埋發塚皆廉得姓名榜之通衢約毋再犯悉奔他境遷南京路轉運度支判官累中都路都轉運副使以親老與弟監察御史都俱乞侍養尋丁憂服除調大原治中遷樂州刺史充宣差北京路規措官拘括散逸官錢百萬人爲戶部郎中權右司奏事稱旨被詔由海道漕遼東粟販山東高其價直募致海買船三遷中都西京按察副使至按察使大安三年充宣差行六部侍郎行西南路六部尚書佐元帥抹撚盡忠備禦西京有勞召爲戶部尚書賞銀絹宣宗卽位預衛紹王降封議語在王紀項之中都戒嚴擢知大興府佩虎符便宜行事彈壓中外軍民坐被酒以褻衣見詔吏解職起爲刑部尚書中都圍解爲河東路

宜撫使興定元年疾卒

幹勒忠本名宋浦蓋州人習女直契丹字歷兵部樞密院尚書省三令史再轉大理寺知法選右三部司正勒忠練遼邊事嘗奉命使北歸致馬四千餘匹詔褒諭之大定二十六年爲監察御史轉尚書省都事章宗立選兵部員外郎出爲滄州刺史河東路提刑副使徙單移刺古舉以自代改滕州刺史授北京副留守入爲同簽樞密院事兼沂王傅承安二年拜武寧軍節度使致仕泰和三年卒年七十一勒忠性敦愨通法律以直自守不交權貴故時譽歸之

張煒字子明洺州永年人本名燦避諱改大定二十五年登第調葭州軍事判官選中都左警巡使轉戶部員外郎承安五年天久陰晦平章張萬公奏此由君子小人邪正不分所致大抵

論人當先德後才君子宜在內小人宜在外章宗問孰爲小人乃指煒與文緇署丞田櫟都水監丞張嘉貞雖有幹才好奔走以取勢利無德而稱詔三人皆與外除煒鎮西軍節度同知改西京轉運同知時大築界墻牒主役事毋憂起復桓州刺史奏請以鹽易米中所言利害甚多上恐涉細碎不能縷詰詔尚書省詳問毋爲虛文俄充宣差西北路軍儲自言歛不及民可以足用多募商買妾指產業逃繫隣保一路爲之疲敝以舊屯故繒折給軍士皆棄於道而去後河東兵敗軍士猶云張宣差刻我欲倒戈殺之歲餘改戶部郎中丞相崇浩奏煒長於措辦請給錢通前增息百萬遷翰林直學士仍兼規措職事有應奏者許得專達歲差幹事官計本息具奏上從之泰和八年伐宋進銀五千兩上以能典利詔曰汝幹集資儲固其職也母令軍士

有議人之短汝朕皆知之乃自西北路召還勾計諸道倉庫除
簽三司事代以中都轉運戶籍判官王謙謙至發其姦竊前後
散失錢物以鉅萬計對獄者積年大安三年起爲同簽三司事
陞戶部侍郎貞祐初遷河北西路按察轉運使二年春都轉運
同知邊源因中都乏糧以兵萬人護送通州積粟軍敗而死平
章高琪舉煒代源行六部事以勞進官一階收河北東路轉運
使宣宗遷汴命佐右丞胥鼎前路排頗及修南京宮闕無何坐
事降孟州防禦使三年遷安國軍節度使致仕明年卒煒通曉
有才喜言功利寡廉節。交通部民閭元輩。縉紳游之。

裴滿亨字仲通本名河西其先世若遼海祖虎山天輔間移屯
東受降城以禦夏人後徙居臨潢亨性敦敏習儒業大定間收
充奉職復與張發盧庸俱登二十八年進士升爲奉御世宗間

上古爲治之道亨。奏陛下欲興唐虞之治。要在進賢退不肖。信賞罰。薄徵歛而已。上嘉納之。章宗卽位。因先朝信臣擢爲監察御史。論以朕左右侍臣多門第顯。惟爾由科甲進。國家利害當爲朕盡言。因劾內侍梁道兒恃恩驕橫。朝士側目。遷鎬王府尉。出爲定國軍節度副使。遷大名府同知。先時濠州縱橫莫制。甫下車。宣明約束。閩境帖然。承安四年。改河南路按察副使。就遷本路副統軍。中都西京等路按察使。遇世襲家豪奪民田。悉檢其實。還之。泰和五年。除安武軍節度使。歲大雪。民多凍殍。輸已俸爲贖贍。及勅率僚屬大姓同出物以濟。轉河東南北路按察使。卒於官。上聞而惜之。贈嘉議大夫。厚爲之。賜卹。性謹密。出入宮禁。數年。讜議忠言多。所裨益。悉焚其藁。雖家人輩莫知。所歷州郡皆有政績可紀。張發字伯英。許州臨潁人。初調寧陵縣。

傳改泰定軍節度判官率儒士行鄉飲酒禮改同州觀察判官
朝議徵鴈鴈羽爲箭以給邊州物少價貴卒不可得毅謂何羽
不可以距京遠節使必欲報省請身任咎責從之俄補尚書省
令史除鄭州防禦同知改北京鹽使丁父憂服除遷監察御史
伐宋轉武寧軍節度副使又丁母憂服闋貞祐二年改惠民司
令歷河南治中熙州刺史刑部郎中同知河南府事遷河東南
路轉運使權行六部尚書安撫使興定元年疾卒毅天性孝友
任子悉先諸弟俸入亦委孳之未嘗問其有無 盧府字子憲
蘄州豐潤人初調唐州軍事判官轉定平縣令治舊堰引涇水
溉田民賴其利補尚書省令史出爲南京轉運副使中都戶籍
判官察廉遷禮部主事累鳳翔治中大安三年徵陝西屯田軍
衛中都以庸簽三司事主兵食至潞州放還屯田軍庸改乾州

刺史入爲吏部郎中至寧元年改陝西按察副使移書行省僕散端謂慶陽平涼德順陝西重地長安以西邠爲扼塞重兵屯守夏人果陷邠遂圍平涼庸繕治城池積芻粟團土兵爲備矢盡取射城上箭以濟急用出府庫賞有功人樂爲死卒賴以完論功進官四階遷按察轉運使貞祐三年詔諸道講究防秋庸陳便宜自邠延至積石雖多溝坂無長河大山爲之屏蔽惟恃弓箭手以禦侮夏人畏其剛猛善鬪熟于地利人情樂土且耕且戰緩急將自奮近年徙屯他所時多侵軼深以爲患防秋之際宜先清野掌軍之官屢代何益未幾改定海軍節度使山東亂老不能赴請醫致仕興定三年卒

王擴字充之中山永平人明昌五年登第調鄧州錄事遷懷安令猾吏張執中畏擴到官孳家避去歷徐州觀察判官尚書省

令史德州防禦同知詔賑山東西路饑民棣州尤甚限外給
之泰和中山東盜起安撫張萬公牒往督捕橫行章丘道中遇
一男子舉止不常捕訊果歷城大盜衆以爲神再遷監察御史
章宗滅圖殺者死中外聞之爭務出罪橫奏生者從讎死者何
辜人稱得中時置三司治財上言存乎其人大定間曹瑩之爲
戶部財用殷阜今三司職掌皆戶部舊式官乃戶部舊官吏亦
戶部舊吏何患于戶部而智于三司乎詔乃罷之素與張煒同
舍相厚及考按煒事無所假借煒使人讓曰君不念故人耶答
以奉詔安得復顧大安中轉橫海軍節度同知河東北路按察
簽事貞祐二年前上書陳河東守禦策大畧謂分軍守隘散則不
成合則勢重饋餉一塗以逸待勞以主待客此上策也方今軍
校猥衆分例過優十羊九牧徒費供給乞以千人爲一軍擇

重者以爲萬戶佐以兩猛安四謀克敬閱約束豈不簡易而省費哉又百按察兼轉運本欲假糾劾之權以檢括錢穀邇因兵興軍府反得制糧道如令州府長官通掌資儲則弊立革按察之職舉矣又數免租稅科糴益繁民不爲恩徒增廩給教練無法軍不足用皆當時實事不見省川遷汴後召爲戶部侍郎除南京路轉運使太府監奏羊瘦不可供御宣宗召擴詰問奏官無羊皆取於民今民心未安宜崇節儉廷議肥瘠非所以示聖德也上首肯之平章高琪謂聖主焦勞萬機賴膳羞以安養臣子宜盡心答以此尚食監事何勞宰相琪默然銜之有司奪市人衣以給往戍潼關軍士京師大擾白請於琪三日造之琪怒不從潼關已破元兵至近郊遣擴行六部事規辦芻糧同戶部員外郎張好道白由商號過中牟不可進琪奏擴畏避下吏

論死特薄其責削兩階好禮削三階皆杖之降爲遷授
繁使行六部侍郎規辦奏犖軍食逾月權陝西東路轉運使行
六部尚書致仕興定三年卒諡剛毅擴博學多才梗直不容物
以是不振於時

趙重福字履祥豐州人通女直大小字試補女直話院令史轉
兵部譯使陝西提刑知法遷陝西東路都勾判官右藏庫副使
陳州防禦同知時宋謀人蕪泉入河南重福跡之至蕪臺見前
一舟將渡河令從者大呼忽有愴惶失措者執之果泉也改滄
州鹽倉副使歲饑民煮蕪貢以給食往往被杖自言寧使課殿
不忍殺人歲滿當降右丞完顏匡三司按出虎特薄其罰除織
染署令大安三年佐戶部尚書張埴調兵食于古北口遷都木
少監貞祐二年行西北路六部郎中治密雲縣守城有功遷河

間府同知行六部侍郎權濟州防禦使俄兼戶部員外郎攝河
北東路兵馬都總管三年河間被圍府兵既少又多羸疾勸父
老率子弟强者戰弱者守圍乃解去遷河東北路轉運使致仕
重福于元光二年卒 王浩起身爲吏初辟涇陽令有善政察
廉第一民絲毫無所犯時西臺檄州縣增植桑棗督責嚴急將
坐以罪浩曰是縣所植已滿其效若欲增植必盜他人所有取
彼置此未見其利主者辭塞立心愛民去日爲立生祠歲時思
之南遷後爲扶溝令天興元年正月民錢大亨等將送款于北
以浩有恩不忍刳持日遣所知勸降浩終不聽與主簿劉坦尉
宋乙並見害時辟舉法行縣官多得人如典平師夔臨潼武天
祺汜水党君玉偃師王登庸高陵宋九嘉登封薛居中長社李
大翼河津孫鼎臣邠城李無黨滎陽李過庭尉氏張瑜長葛張

子玉猗氏安德瑋三原蕭邗傑藍田張德直葉縣劉從益皆清
慎才敏極一時之選而能狀持百年將領之神者亦曰吏得其
人故也

弘脩錄卷二百三十九

終

弘脩錄

卷二百三十九

書

金瓶官一

弘簡錄卷二百四十

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金庶官二

李師雄 鄭建克 毛碩 楊仲武 耶律懷義 塗山

盧彥倫 子璣孫亨嗣 毛子廉 李三錫 孔敬宗

李師夔 沈璋 王政 蕭王家奴 蕭恭 伯德特肉補

趙賊 石抹卞 龐迪 郭企忠 張弈

移刺幹里朶 蒲察幹論 俛散渾坦 烏古論三介

白彥敬 乾石烈胡刺 移刺溫 尼麗古鈔 石抹榮

阿勒根彥忠 移刺成 按答 完顏兀不喝

移刺慥 移刺子敬 高松 高閣山 高竑

李師雄字伯威，馮門人，有材力，喜談兵。慕古之英雄，故名師雄。宋宣和中，試中騎射，累官大名清平尉。王師至，與府僚出降。攝本路兵馬都監，入齊爲大總管府先鋒都統，制知淄州。國廢，改汴京馬軍都虞候。歷知寧海軍、曹州刺史。皇統二年，遷武勝軍節度使。正隆末，以事就逮，降河州防禦使。宋將吳璘兵至城下，州人謀欲出降，師雄止之。乘城拒守，宋將權儀鞭馬方上浮橋，引弓射之，墜于橋下，擒之。宋師退，未幾以疾歸汴卒。

鄭建充字仲實，其先京兆人，占籍鄜州。仕宋累官知延安府，鄜延路兵馬都監。天會七年來降，仍知延安。宋劉光烈兵八萬來攻，所領祇屯兵三千，相距四十餘日，攻益急。建充遣人會斜喝，軍夾擊破之，俘其裨將賀貴。遷節制司統制，軍馬改京兆府路兵馬都監。敗宋曲端於彭原，擊宋將高昌宗於延安，盡復城。

邑復知延安府事入齊累遷博州團練使知寧州國廢入宋敗
環慶路經略安撫副使仍知州事陝西復歸轉經略安撫使知
慶州從破甘谷城授平涼尹值營建南京宮室大木浮河而下
筏工多沉溺有司誣爲逃亡爲白于朝得釋正隆軍興括筋角
造軍器往往生拔其角牛有泣下者亦白于朝平日雖謙遜下
士然性剛暴敵已以上一無所屈首部文移有不應法輒即毀
裂在位者多銜之胥吏李換竊用公帑自度不得免誣以藏甲
欲反遂與長子恕俱死獄中

毛頌字仲權甘陵人宋末試弓馬子弟中選調高陽關安撫司
准備差使尋辟河間尉爲兵馬都監宗望軍至率本部迎降入
齊由淮東路第一副將擢知滑州充劉麟行營中軍統制天眷
間歷汴京路山東西路兵馬都監皇統元年權知拱州柘城酒

監房人傑以兵叛應宋將張俊時據亳州碩發兵討之躬扣城門呼耆老諭意遂縛入傑以降入縣慰安百姓衆皆感悅刻石紀其事四年真授刺史梁王宗弼承制超武義將軍改知曹州有書生投書不遜辭涉謗訕僚屬皆不堪敷延上座謝曰使碩常聞斯言庶乎寡過士論嘉之尋遷鄭州防禦使改通州天德二年充陝西路轉運使近邊所產麻粟蕎麥賦入甚薄市井交易惟川絹乾薑商賈不通酒稅耗滋請視汴與燕京例給交鈔通行其鞏會德順道路多險鹽斤太重請一引分作三四以從輕便朝廷皆從之秦州倉粟陳積百姓有支移者止就本州折納其直公私咸便改河東南路轉運使上言頃者定立商酒課不量土產厚薄戶口多寡及今昔物價增耗一槩理責至監官被繫失身破家折財逃竄又姦吏盜有實錢而以賒券輸官故

河東積負多至四百餘萬貫公私苦之請自今禁約酒官不得折准賒貸惟許收用實錢則官民俱便至今行之秩滿除南京路都轉運使大定六年致仕卒于家碩性謹飭文雅好事每見古人行事有益於時者常書置座右以爲莅官之戒

楊仲武字德威保安人父遇以勇聞關西爲宥州團練使宋末仲武謁經略使王庶求自効用爲先鋒妻室入關來降以爲安塞堡環慶路兵馬都監皇統初復陝西將兵戍鳳翔屢却宋軍除知寧州關中荐饑境內盜賊縱橫仲武悉討平之改坊州刺史遷同知臨洮尹臨洮地界接西羌與木波雜居相率爲寇仲武從數騎入其營曉以禍福且諭之曰此皆邊將貪暴部校侵漁以至此爾今懲此輩不復擾害羌人喜悅寇掠遂息海陵營繕南京改河中府同知使典浮橋工役木波因覘仲武不復能

來復寇熙河主帥諭之不去必待楊總管來具奏其事詔復遣仲武至與其首相見責以負約對曰邊將苦我故來求訴於上官耳今幸見公願終身不復犯塞乃舉酒酌天折箭爲誓仲武因飲以酒曰當更爲汝請若復背約必用兵矣羌人羅拜而去後伐宋以爲威定軍都總管駐兵歸德大定三年除武勝軍節度使改陝西西路轉運使卒

耶律懷義本名孛迭遼宗室子屢以戰功遷點檢同知諫止遼主謀奔西夏不聽與塗山皆來降從宗翰軍領謀克天會初承制拜爲西南路招討使令易置新降諸部乃擇諸部衝要之地建城市通商賈諸部兵革之餘人多匱乏自是衣食歲滋畜牧蕃息伐宋降馬邑破鴈門屯兵進圍太原別引所部降清源縣徐溝鎮與諸將屯汾州境時河東陝西路兵來救劉光世折可

求柵于文水西山要害之地因分兵襲敗之明年再舉從妻室
取汾州及其屬邑遂過平陽出澤潞以趨河陽所至皆降及大
軍圍汴屯于京西域既下宋兵出奔邀擊盡殲之從攻鄆鄆二
州及討平鄭州叛者又下濮州與雷澤縣破大名東平府徐充
等州皆有功七年還鎮十年加尚書左僕射改西北路招討使
凡在西陲幾十年撫御有恩去日老幼遮道攀戀數日不得發
天眷初爲太原尹治有能聲改中京留守從宗弼過烏納水還
中京改大名尹不赴治所祇受俸儀每歲春木尾從餘聽自便
海陵卽位封漆水郡王又進封莘王與蕭王正隆例降景國公
子神都幹從海陵南征爲西北路招討都監迎侍之官因率于
雲中年八十二耶律塗山系出遙輦氏世爲顯族仕至金吾
衛大將軍承制授西北路招討使伐宋率本部爲先鋒至汾州

遇宋將折家軍併力破之從攻太原隆德府及入汴克洛陽又從婁室平陝右天會七年授太子少保十年遷尚書左僕射致仕卒年九十一正隆例贈特進鄴國公

盧彥倫臨潢人以材幹聞遼天慶初蕭貞一留守上京薦除殿直勾當兵馬公事督捕臨潢盜賊有功至團練使遼兵敗於出河店還至臨潢令散居比戶給養民苦其暴侵擾無所不至留守耶律赤狗兒不能禁戢衆無敢言獨彥倫極言之時不能用度事不可爲天輔四年乃從留守撻不野降投夏州觀察使權發遣上京留守事師還撻不野復叛彥倫率所部逐之盡殺城中并丹遣使來報未幾遼將耶律馬哥以兵取臨潢比拒守七月救至解去因召赴闕天會二年知新城事時城邑初建民居公宇多所經畫悉皆有法改解江軍節度留後知咸州烟火事

未幾授節度使天眷初行少府監兼都水使者克提點京城大
內所素性機巧能迎合悼后意頗見寵用改節利涉軍歲餘遷
侍衛親軍馬步軍都指揮使爲賀宋歲元使改禮部尚書加特
進封郇國公天德二年出爲大名尹明年詔營造燕京宮室以
疾卒年六十九 子璣字正甫以蔭補閣門祇候累遷爲客省
使兼東上閣門使改提點太醫政坊司大定十五年克宋主生
日副使還遷宣徽同知至左右二宣徽使歷太府監開遠定武
二軍節度使致仕明昌四年復起年已七十強健如昔泰和初
詔預天壽節宴與大臣握槊戲璣獲勝焉二年元妃李氏生皇
子滿三月章宗命以所策杖爲洗兒物從幸玉泉山詔與致仕
宰相俱會食許策杖給扶又從幸秋山賜名馬極羨眷遇泰和
六年卒年八十 孫亨嗣字繼祖以祖蔭補閣門祇候內供奉

歷同監平涼府醋務天山鹽場母憂服闋屢監萊州汲縣東平
酒務課最遷白登縣令明昌四年行六部差規措軍前糧料入
爲與給直長遷署丞改西京中都戶籍判官并太倉使尚醞署
丞丁父憂大安初兼太子家令崇慶元年遷順天軍節度同知
時兵興徵調煩急特以辦最遷定遠大將軍入爲戶部員外郎
貞祐二年擢莒州刺史會討楊安兒爲行六部兵罷還州卒年
六十一與弟亨益友愛讓以父廕亨益早卒子號幼稚盡以舊
業田宅奴畜財物與之

毛子廉本名八十高潢長秦人材勇善射遼季羣盜起募勇士
得召見賜甲仗率百人會所在官兵捕盜以功授東頭供奉官
賜良馬天輔四年遣謀克辛幹持刺移刺窟斜招諭臨潢卽率
戶二千六百來歸令就領其衆佩銀牌招未降軍民盧彥倫怒

其先降令健將孫延壽引騎兵二千伺殺子廉并妻及二子子廉與竊斜經險阻中騎兵聞之延壽與一將突出直犯子廉引弓斃其一延壽挺槍幾中子廉避過與搏生擒延壽衆潰去天會三年除上京副留守久之兼鹽鐵事天眷中以例除燕京麴院都監宗幹嘗問宰相子廉之功十倍彥倫在臨潢十餘年吏民畏愛如一日俄除寧昌軍節度使開海陵弑熙宗子廉歎曰曾不念國王定策之功耶遂致仕大定二年卒

李三錫字懷邦錦州安昌人以貲得官遼季盜攻州城州人推主兵事設機應變城賴以完錄功授左承制遼主走天德從劉彥宗辟將兵保白雲山大兵次萊州率衆來降命攝臨海軍節度副使叅預元帥府軍事改知嚴州宗望伐宋領行軍猛安敗郭藥師軍於白河進汝州防禦使從闕母再克汴京護宋二主

改副歸德軍齊國廢詔擇吏三十人與俱行三錫在選中選爲
慶州刺史三遷武勝軍節度使察廉第一轉三階改節安國軍
除河北西路轉運使致仕三錫生平政事強明所至稱治世宗
舊聞其名大定初起爲北京路都轉運使制下已卒

孔敬宗字仲先其先東垣人石晉末徙遼陽遼季任寧昌劉宏
慕官幹魯古兵至境上敬宗勸宏迎降用爲鄉導拔顯州以功
補順安令天輔二年詔與宏率懿州民徙內地授世襲猛安知
安州事將兵千人從宗望伐宋汴京平卽命守之歷靜江軍節
度留後石辰信磁四州刺史寧昌歸德二軍節度使階光祿大
夫致仕大定二年卒

李師夔字賢佐奉聖州永興人少儻有大志以磨入仕爲本
州趨監天輔六年太祖襲遼主于鶻鶻樂郡守委城遁衆無所

屬相與叩門請主郡事乃搜卒治兵廸古乃兵至奉聖州與同里沈璋密謀一城之命懸於此舉詰旦率親信十數單出城見余賂約降願無以兵入城及俘掠境內余賂許諾詔以師襲領武定軍節度使璋爲副使賜駿馬二許以便宜俾招未附者明年加左監門衛大將軍劇賊張勝萬人逼城度衆寡不敵僞與之和日致饋給勝信之乘其不備使人刺殺勝以其首徇曰汝輩皆良民脅從至此今元惡已誅可棄兵歸復其所賊衆大驚皆散去別賊焦望天尹智穆衆數千復來寇設伏歸路使人行反間果自相疑望天先引去智穆勢孤亦還遇伏而敗遂執斬之是後賊衆不敢入境以勞遷靜江軍節度留後武平軍節度使改東京路陝西東路轉運使致仕封任國公卒年八十五

沈璋字之達學進士業旣爲節副加授太常少卿遷累鴻臚衛

尉二卿母憂起復山西路都轉運副使從伐宋平汴京衆爭趨
貨貨獨載書數千卷而還太行賊陷潞州殺其守姚璠官軍討
平之命璋權知州事至則招復逋逃賑饑收塋橫屍民頗
安輯帥府牒盡誅賊黨又軍卒當緣坐七百人璋以職在招亡
撫存矧此輩初無叛心爲賊所迫有不得已者今旣招之使來
復命殺之有所不敢帥府始怒俄頃稍霽因召潞軍吾始命戮
爾今汝使君活爾矣皆感泣而去朝廷聞而嘉之拜左諫議大
夫知潞州事百姓咸爲立祠移知忻州改同知太原尹加禮部
侍郎介休人張覺聚黨亡命山谷鈔掠邑縣嘗招之以前降者
被殺不肯降必得沈公一言我乃無疑於是命璋往招覺卽曰
降復轉吏侍西京副留守同知平陽尹遷利涉軍節度使爲東
京路都轉運使改節鎮西軍天德元年以病致仕卒年六十妻

張氏嘗爲太子光英保母贈銀青光祿大夫子宜中天德三年
賜楊建中榜及第

王政本名南撒里辰州熊岳人其先仕渤海及遼皆有顯者政
嘗使高麗因改今名當遼季亂浮沈州里高永昌知其材畧欲
用之度其無成辭避不就後敗人爭縛以爲功政獨逸巡引退
閨母聞而異之言於太祖授盧州渤海軍謀克從破白霜下燕
雲及伐宋滑州降留爲安撫使從數騎入州前此多殺守將復
爲宋守人以是憂政曰苟利國家雖死何避宗望壯之曰身沒
王事利及子孫汝言是也民有囚僞爲盜釋其縲繫賑以倉廩
州民皆悅不復爲叛旁郡聞之亦多降者宗望召至轅門撫其
背曰吾以汝爲死矣乃復有功如是慰諭者久之天會四年同

同監燕京都麴院未幾除金勝軍節度同知改權侍衛親軍都

指揮使兼掌軍資值軍旅始定紀綱未立庫筭吏因緣爲姦政
獨明會計嚴屬鑄金帛山積較其出納無錙銖之失關母念其
貧遣以黃金百兩銀五百兩及所乘馬六年授左監門將軍歷
安州刺史檀州軍州事戶吏房主事天眷元年遷保靜軍節度
使致仕卒年六十六子遵仁遵義遵古

蕭王家奴奚人居庫党河爲人魁偉多才未冠仕遼爲太子率
府奉天輔七年都統臬定奚地因率鄉人來降命爲千戶領其
衆奚王回鹵保死親黨金臣阿古猶保撤葛山命與突撚往討
生擒之降其餘衆時平濼多盜卽以所部屢破賊兵斬馘執俘
數被賞賚從宗望敗郭藥師於白河有功至河上遇宋兵扼津
要與諸將擊敗之進圍汴破其東門宗望再舉軍至中山諸門
分兵出戰焚我攻具析州河間各以兵來援皆敗之師還屯鎮

河朔濱州賊葛進聚衆數萬從臨淄李董照里領謀克兵先登
力戰大破其衆明年攻滄州宋兵拒戰復從照里擊走之又引
商船十八破宋將徐文舟百艘于海島斬首七百級獲舟二十
天會八年除靜江軍節度授世襲于戶從宗弼征伐爲萬戶遠
擢五院部節度使天德二年改烏古迺烈招討都監卒 蕭恭
字敬之乃烈奚王之後父翊天輔間歸朝從攻與中遂以爲尹
師還以恭爲質子伐宋翊領建興成川懿五州兵爲萬戶宗弼
以恭材勇使代其父行時年二十三至中山宋兵出戰恭先以
所部擊敗之復從經畧山東及渡淮襲康王皆在軍中師還承
制授德州防禦使改棣州隸奚人屯濱棣間者皇統間進橫海
軍節度同知父憂起復爲太原少尹獎廉遷中京留守同知入
爲兵部侍郎授世襲謀克坐問禁中起居狀決杖奪官貞元二

年擢大興尹同知歲餘遷兵部尚書爲賀宋生日使母憂起復
侍衛親軍馬步軍都指揮使四年加光祿大夫復任尚書經畫
夏國邊界還過臨潼失所佩金牌憂恚成疾卒海陵深悼惜之
賻贈加厚命子護衛九哥襲喪以還

伯德特离補奚五王族人仕遼御院通進天會初與父撻不也
歸朝授世襲謀克後以京兆尹致仕特离補招降松山平薊等
州未附軍民督之耕作宗望伐宋以爲行軍猛安留規取保遂
安三州攻安肅軍率所部大破河間雄保等授兵十餘萬拔之
卽攝通判事降將胡愈陰結衆謀亂勒兵擒愈及其黨五十餘
人改安肅軍爲州就除同知州事轉磁州捕獲太行羣盜帥府
屬以磁相二州屯兵擒王會孫小十苗清等羣盜遂平遷濱州
刺史廉入優等母憂起復改刺涿州入爲工部郎中從張浩營

繕東京宮室及田穀黨事起朝省員空命攝行六部事遷大理卿出爲東南二京留守同知天德三年父憂起復除洺州防禦使正隆盜起引水注附城背河以爲固盜弗能近州賴以安遷崇義軍節度使未幾告老卒特離補爲人孝謹政尚簡靜不黷貨財凡調官行李止車一乘婢僕數人而已

趙賊字德固遼陽人其婦翁以優伶得倖於遼主陔補閭門祇候累遷太子左衛率後居瀛州宗望討張覺賊踰城出降卽授瀛州千戶山洛苑副使遷爲使檢校工部尚書從伐宋遷棣州刺史侍衛步軍都虞候再舉攻真定與有功改刺商州檢校右僕射五年同知信德府路統押軍兵兼沿邊安撫事明年權知濟州八年從定河南授隴州團練使十年改知石州賊因久在兵間不善治民坐謗議謫監平州甜水鹽齊國廢授宿州防禦

使統本路軍賊爲人重義喜接儒生嘗以事至汴有故人子負官錢贈以橐金其子悉爲私費復代輸之尋有訟徐帥不法者承詔鞠治坐委曲營護廢罷寓居於燕海陵出領行臺賊往見之因訴其事卽位起爲保大軍節度使貞元初改內省使未幾爲中都路都轉運使再徙順義興平入爲太子詹事鎮沁南以疾卒年六十六

石抹卞本名阿魯古列五代祖王五遼駙馬都尉父五斤爲羣牧使從宗輔秋山十年十三已能射連獲二鹿宗輔奇之賜以良馬及金吐鵝天會末宗弼召隸帳下丁父憂人爭附太師宗弼左副元帥撻懶皆使人召卞不往後皆坐誅人多其有識宗弼復取河南與宋人戰潁州軍少却身被七創獨率勇士十餘奮擊敗之入朝授忠勇校尉遷宣武將軍河間少尹察廉升遂

與壽州刺史母憂起復唐州刺史海陵伐宋爲武毅軍都總管
由別道進遇宋伏兵擊敗之遂下信陽軍及羅山縣至樊州宋
守將先遜因取其城時軍士皆欲逃歸亦爲關子山猛安所劫
舍於樊水之曲陰約漢軍乘夜掩殺關子山猛安復將其軍大
定二年除鄭州防禦使領行軍萬戶再伐宋遷武勝軍節度使
請和後歷河南大名二尹西南路招討使請新大名城郭益修
守禦盜賊不敢發遷臨洮尹卒于官年六十三

龐迪字仲山延安人少儻喜讀兵書習騎射兼學推步孤虛
之術應募隸涇原路第三副將破賊有功授保義郎嘗從百餘
騎經行山谷遇夏人數千衆皆駭懼請避迪躍馬犯陣敵皆披
靡身被重創神色自若完軍以還山是知名擢爲正將權發遣
涇原路兵馬都監僞齊經畧使張中孚舉迪權知懷德軍兼沿

邊安撫使更兵五萬薄城廵開門以待衆不敢入因擧數千騎分門突出破之斬首五百級獲軍資羊馬甚衆復破關師古兵擢知鎮戎軍尋權淮南東路馬步軍副總管總制沂密淮陽兼知沂州父憂起復環慶兵馬都鈐轄權知邠州齊廢改華州防禦使廸爲政素善軍變被執不忍刳辱衆悔釋之復還領州天眷中歷永興軍熙秦路兵馬都總管兼知京兆府徙臨洮尹開渠溉田會陝右大饑流民利其食居人籍其力各咸得所爲立碑紀政績官制行轉武功大夫博州團練使特授定遠大將軍七年除慶陽尹經歷三考以治最聞詔書褒美西人榮之正隆元年遷鳳翔尹南征役擾徵歛煩急官吏因緣爲姦貧富坐困廸悉召其民共議增減不加威督而役力均人情大悅五年徙汾陽軍節度使大定初復尹臨洮遷南京路都轉運使省事惜

費爲政安靜河南稱之終絳陽軍節度使年七十廸性純孝父病醫藥勿効仰天泣禱刲股作羹父獲以安昆弟析家財盡以與之一無所取官爵之廕率先諸姪疾革沐浴朝服而逝

郭企忠字元弼唐汾陽王子儀之後世爲北方節鎮至祖承勳入于遼子孫繼爲天德軍節度使父昌金降爲副使企忠幼孤事母孝謹年十三居喪哀毀如成人服除襲父官加左散騎常侍天輔中大軍至雲中遣耶律坦招撫送率諸部未降太祖問知其家世禮遇優厚賜以白鷹命同勾當天德軍節度事徙所部居于韓州天會三年伐宋領西南諸部番漢軍兵爲猛安從破鴈門屯兵遙領桂州觀察留後鎮代州五臺山賊楊麻胡等聚衆數千與同知廸里討平之遷知汾州大軍初平居民多被掠去城邑蕭然因親詣帥府力請贖還未幾完實如故汾人德

之石州賊鬪先生衆數萬至城下率吏民城守合援兵力擊破之六年改靜江軍留後遷天德軍節度使汴京步軍都指揮使累金吾衛上將軍秩滿權沁州刺史卒年六十八

張奔字彥徵澤州高平人以廩補官仕齊爲歸德府通判國廢偵知有兵二萬在郡將謀爲亂約夜半舉燎相應預選市丁結陣要巷開小南門以示生路亂不得作止明亡匿略盡擒誅首惡會都統完顏魯補兵至欲根誅餘黨奔保以闔門遂止承制除同知府尹事天眷元年以河南與宋改沂州防禦同知復取後徵赴行省既定汴京授副留守歷陳蔡二州防禦同知陞太原尹晉寧軍報夏人侵界詔往至境按籍各歸所侵土而還奏言折氏世守麟府以抗夏人本朝有其地遂以與夏夏人平其丘壠戮及其屍折氏怨入骨髓而不得報今復役守晉寧故激

怒夏人條上其罪欲開邊釁以雪私讎耳今若徙之他郡則邊界無事朝廷從其議移折氏守青州夏人遂安正隆間同知西京留守事遷河東北路轉運使大定三年徵爲戶部尚書甫視事得疾卒

移刺幹里朶俗名八斤系出遼五院司通將丹字天會時伐宋隸軍中遇戰先登屢獲偵人上功補尚書省令史十五年籍發山後諸部兵與右丞蕭慶會遇官軍數千皆南窺輒以兵邀擊獲其輜重財物悉送有司一毫弗取以勞遷修武校尉又論復河南督諸路帥臣進討功遷宣武將軍時六部未分以爲兵刑二部主事未幾遷右司都事皇統二年授大理正昭德軍節度同知察廉陞孟州防禦使正隆間轉北京留守同知會發遊古河關子山等猛安兵討契丹別遣幹里朶押軍南下至松山縣

爲賊黨江哥所執欲推爲主盟辭言受國厚恩豈從汝反要以
契約寧死不可得賊知不可屈加以困辱使布衣草履逐馬而
行將欲害之因說其監奴得脫還六年九月改北京路轉運使
大定初爲博州防禦使再遷利涉軍節度使有農民先因避賊
寄錢三十千於鄰家賊平索之不與訴于縣官却以無契驗至
是陽怒械繫其人給爲指汝同盜鄰人懼自陳有欺錢之隙責
歸釋之郡人駭服改通遠軍節度使卒

蒲察幹論上京益速河人徙臨潢祖忽土華父馬孫俱贈金紫
光祿大夫幹論剛毅有技能天輔初以功臣子充護衛遷左衛
將軍定武軍節度使召爲右副都點檢天德初投世襲臨潢府
路忒呂斜魯猛安改東平尹賜錢千萬累除河南尹海陵伐宋
以爲右領軍都監大定二年仍尹河南兼都統軍使宋兵萬人

據壽安縣出遇嵩州刺史石抹突刺押軍萬戶徒單賽補引騎
兵三百巡邏二人請益師幹諭使猛安完顏鴉沙虎率七百人
往赴號令士卒皆下馬跪射宋兵不能當走入縣城突刺進逼
之宋人棄城去追及于鐵索口復大敗之遂復壽安改北京相
守大定尹卒于官

僕散渾坦浦與路挾邁人身長七尺勇健有力善騎射年十六
從其父胡沒速征伐初授修武校尉爲宗弼扎也天眷二年與
宋岳飛相拒獨領六十騎深入覘伺至鄆陵敗宋護糧軍七百
餘人多所俘獲皇統九年除慈州刺史再遷利涉軍節度使授
世襲濟州和木海總猛安涉里幹設謀克貞元初丁憂起復舊
職歷泰寧永定軍改咸平尹海陵殺其弟忽士召渾坦至南京
將罪之憐其有功不因弟得官遂釋之改節與平軍世宗擢廣

寧尹窩斡反爲行軍都統與徒單克寧俱在左翼敗賊於長濼
改臨潢尹賊平賜金帛改曷懶路兵馬都總管徙顯德軍慶陽
尹致仕大定十二 years 上思舊功復起利涉軍節度使進階金紫
光祿大夫歸老卒年七十二渾坦歷一十七官未嘗爲佐貳性
沈厚有識雖未嘗學問明於聽斷所至有聲

烏古論三合曷懶路變也窟河人後徙真定宗輔聞其勇略選
充扎也多積勞苦後從宗弼征伐補麴院都監伐宋與遇頴州
先登破之皇統元年領漢軍千戶隸以軍四千俄除鄭州防禦
同知世宗以父舊人令輔佐太子擢爲少詹事洛州名郡陞爲
防禦使以酬其勞累遷永定軍節度使臨潢鳳翔東平三尹陝
西路統軍使節制州郡躬行儉約政先寬簡邊庭久靖人民獲
安召爲簽書樞密院事卒授其子大興河北西路愛也窟河世

襲猛安阿里門河謀克階武功將軍

白彥敬本名遜設部羅火部族人祖屋僕根父阿斯仕遼爲奉
府率彥敬初名彥恭善騎射起家爲吏累補元帥府并尚書省
令史伐宋爲錢帛司都管勾除都元帥府知事授以金牌招諭
諸部行數千里有功超遷兵部郎中熙宗懼統軍改隸招討司
遣收牌印諭諸部還爲本部侍郎遷大理卿出爲通州防禦使
改刑部侍郎怨家誣告開府慎思與西北路部族謀叛鞫得其
實海陵嘉之遷簽書樞密院事以便宜措置邊防伐宋主調會
寧蒲與胡里改三路兵馬擢吏部尚書充南征萬戶遷樞密副
使討契丹撤八以爲北面行營都統得以便宜行事賜御服皮
裘世宗使完顏謀衍將兵來伐彥敬亦遣偏將率兵拒于建州
之境語載紇石烈志寧傳世宗密遣人乘夜揭榜於北京市購

以官賞恐爲人所圖遂降以爲易速館節度使不數月召爲御史大夫窩斡反遣與紇石烈胡刺往西北路招討司市馬得六千餘匹完顏思敬得其新馬三千追襲賊于山後遣彥敬屯夏國兩界間遂平之還爲兵部尚書出更鳳翔太原二尹兼河北東路兵馬總管尋改河中尹大定九年卒于官 紇石烈胡刺晦發川噠敦河人徙西北路識契丹字爲帥府小吏宗輔在燕京遣往候宗弼于陝西時自鳳翔攻和尚原轉使視彼中地形修道築城十二年又往濱州密訪南邊事體及觀劉豫治齊狀得其虛實宗輔甚嘉之皇統初從宗弼渡淮下廬和二州大破張浚韓世忠等軍遣胡刺馳奏賞以金盃重綵五端絹五疋七年授景州軍事同知察廉加忠武校尉天德初分司行臺監察御史歷濟州防禦同知入爲侍御史秩滿再任大定二年遷刑

部員外郎轉泗州防禦使三遷蒲輿路節度使移寧昌軍卒

移刺溫本名阿撒遼橫帳人工契丹小字伐宋從大臭渡江辟江寧府都巡檢江寧太平初下宋遣謀人扇構百姓應者數萬人溫擒其謀者竊謀逆寢宗賜嘉之賜銀千兩重綵百端絹二百疋後每出征伐未嘗不在行間除河北西路轉運同知從宗弼巡邊不之官又從入朝熙宗賜宴已醉宗弼欲有奏請溫恐被酒失次竟掖而出明日熙宗語宗弼曰阿撒事叔甚謹不可去左右宗弼益親信之嘗語其壻紇石烈志寧汝可效阿撒爲人可以幾古人矣未幾除中京路都轉運同知累遷左諫議大夫兼修起居注正隆時代宋爲濟州路行軍萬戶從至揚州軍還除宣徽同知世宗御饌不適口召溫嘗之奏曰味非不美乃南北邊事未息聖慮有所在耳上意釋然俄歷永定震武崇義

臨海四節度使臨海州治近水秋潦暴至城下百姓惶駭躬督役夫身臨不測爲百姓謝卒繕完之移鎮武定歲且旱蝗復割指以血瀝酒中禱而酹之旣而雨霑足有犖鴉啄蝗且盡歲反大熟人謂至誠所感以老致仕卒

尼龐古鈔兀曷速館人初爲大奧扎也起身細微補元帥府遇事爲人勇敢尚氣善伺敵虛實宋將韓世忠率軍數萬圍邳州輒將輕騎數百間道與偵人數往救敗敵兵六千遣往宿州分蒲魯虎軍還至大河遇宋人攻濟州奪戰艦略盡力戰敗之盡復其舟王師復河南宋將田胡陵夜襲李並布輝營士卒盡沒鈔兀從東平總管併力戰却之帥府承制加忠顯校尉爲蕃部禿里賜錢萬貫帛三百疋衣一襲馬二匹將之官大奧請留給邊事許之復賜錢幣增銀二百五十兩馬三匹錄功授慶陽少

尹久在邊陲屢立戰功海陵伐宋命與白彥敬等往討契丹賜
具裝廐馬至北京未進聞世宗卽位亟往迎謁遷輔國土將軍
與都統吾札忽副統渾討窩斡行至涼歷與賊遇左軍小却鈔
兀挺鎗馳入其陣手殺二十餘人賊乃退仍爲前鋒自花道追
賊及于陷泉大敗之事平遷歷西北東北路招討使鈔兀素與
東京留守完顏思敬有隙因奉詔至招討司不行山餞及思敬
爲平章發其私取諸部進馬事被逮將走京師次海濱縣鈔兀
爲人尚氣不受屈辱遂縊而死十九年品以舊功授其子和尚
世襲布輝猛安徒胡服謀克

石抹榮字昌祖七世祖仕遼封順國王遼主奔天德父惕益挺
身赴之見遼主委以軍事軍敗被執將殺之銀朮可白于元帥
彼忠於所事殺之何以勅後得釋後從伐宋卒于軍中時榮方

六歲母忽土特滿携之流離道路宗室神谷得之納爲次室榮就養於家年長事秦王宗翰居幕府天眷二年充護衛熙宗命與胙王角力而勝及連仆力士六七人親飲之酒賜以金幣遷宿直將軍天德初除開遠軍節度使時母尚在神谷家入謝泣下因詔與母俱行賜錢萬貫改天德尹徙泰寧軍再除延安東平尹南征爲神果軍都總管留駐泗州以遏逋卒大定初還鎮東平與戶部尚書梁銖按治山東盜賊充山東東西大名等路都統有疾改太原與益都尹母憂起復召爲簽書樞密院事歷南北東西四京留守陝西路統軍使與河南尹婁室陝州防禦使石抹斡家奴皆坐高賈賣私物抑買買民物解職斡家奴前爲單州刺史刳制民譽以誑朝廷得遷太原同知特詔除名久之復起歷臨潢臨洮二尹卒年六十三

阿勤根彥忠本名窟合山曷連僧人好學通吏事天會十四年
選充兵部孔目官陞尚書省令史除右司都事天眷七年改大
理丞爲會寧少尹進同知入爲吏禮部郎中貞元二年進侍郎
海陵凡有所疑常使裁決必據法以對問有不合則召讓之彥
忠執奏如前終無阿屈同列咸爲懼固執不變由是受知明年
除御史中丞歷戶部侍郎侍衛親軍副都指揮使南伐除南京
路都轉運使不開吏事用劉樞以佐大定二年改大名尹兼本
路兵馬都總管四年入爲刑部尚書詔規措北邊糶食戶口及
秦州臨潢接境度宜安置堡戍駐兵芻糧就經費之還朝以疾
卒年五十二贈祭祿大夫命有司致祭賻以銀絹彥忠性孝友
嘗使宋所得金帛盡分兄弟親友

移刺成本名落兀與按答皆遼橫帳人沉勇有謀通契丹漢字

天會間爲撻懶行軍猛安與宋人戰于楚泗之間率所部先登
大破宋軍功最諸將劉麟約會天長軍議進止復與夾古查合
你從撻懶得宋生口爲鄉導遂達天長宗輔嘉之將廢齊國從
宗弼將兵及再伐宋攻濠州每戰輒先多所摧破再取河南及
蕭懷忠等八猛安先渡河第功授宣武將軍除威州刺史用廉
擢延安同知至昭義軍節度使海陵南伐爲武毅軍都總管以
本軍守磁州會徽八反凡契丹名將皆坐事誅成卽遣其妻子
還汴由是不疑時人高其有識改神武軍都總管遡東道先鋒
使由淮陰進兵以所部護糧赴揚州敵兵乘夜來攻整兵奮擊
斬刈甚衆軍還復鎮昭義察廉優等改河中并臨洮尹招降喬
家等族首領結什角遷南京留守召拜樞密副使封任國公改
北京留守卒計聞上悼惜授其子順思阿不武功將軍世襲威

平路鈔赤鄰猛安下查不魯謀克結十角者西蕃董匪裔孫錢哥之弟祖永吉父世昌皆受宋官襲把羊族長本朝定陝西換世昌忠翊校尉爲鬼蘆族長京賊所殺朝廷遣兵執斬之以鐵哥爲把羊族都管初天會中賜夏人舊積石地名爲祈安城有莊浪四族一吹折門二密臧門三隴逋門四廳拜門其吹折密臧二門夏人被滅之隴逋廳拜二門與喬家族相鄰大定四年宋人被洮州結什角與其母走避喬家族首領播逋與木波隴逋廳拜丙離四族耆老大僧等立結什角爲四族長號曰王子其地北接洮州積石軍南卽隴逋族限大山八百餘里不通人行東南與疊州羌接西卽丙離族與盧甘羌接北卽廳拜族與西夏容魯族接地高寒無絲枲五穀惟產青稞與野菜合酥酪食之其疆境八千里合四萬餘戶隨水草畜牧遷徙不常結什

角念朝廷爲其父報讐欲棄而歸朝四族不許成至臨洮使人
招之乃率衆來附進馬百疋仍請每年貢馬詔嘉其慕義遣能
吏往撫其家厚加賞賜其母尚在莊浪族中夏人伺知往省出
兵圍結什角招之降不從率所部力戰潰圍出夏人執其母去

後語在粘割幹特刺傳 移刺按答父招幹同耶律余睹來降

西京復叛遂遇害按答以死事子授左奉宸熙宗初克護衛除
安州刺史累官東京副留守參政完顏守道經略北方攝咸平
路屯軍都統入爲兵部侍郎徙西北西南兩路舊設堡戍迫近
內地者于極邊安置仍與泰州臨潢邊堡相接除武定軍節度
使以招徠邊部功遷東北路招討使改臨潢尹卒按答騎射絕
倫嘗論及善射者世宗曰能如卿乎復善相馬閱市中見良馬
雖羸瘦輒與善價取之

完顏兀不喝會寧府海姑寨人年十三選充女直字學生補上京女直吏再習小字兼通契丹文字充尚書省令史天德初徐吏部主事鞫問押懶路詐襲謀克事人稱其能擢右拾遺海陵始聞其名後計其實優於所聞遷右司郎中從至淮南入白世宗卽位海陵已知先遣人往復沉思良久曰此大事勿泄于外大定二年秩滿當代世宗喜其善于敷奏特詔再任因語宰相兀不喝爲人公忠後來有如斯人者卿等宜薦舉之窩幹已平詔罷契丹猛安謀克其元管戶口皆隸女直遣往區處分置人戶賑贍貧乏其未嘗爲亂與來降者仍舊若未經罷去猛安謀克合承襲者仍許承襲兼括買契丹馬匹尋改同知大典尹遷橫海軍節度使初到官獻囚能得其情人以爲不寃在任五年卒於官

移刺健本名移敵列契丹虞呂部人通契丹漢字尚書省辟契丹令史攝知除擢右司都事正隆南伐兼領契丹漢字兩司都事大定二年除真定少尹入爲侍御史母憂起復右司員外郎累官陳州防禦使乾石烈良弼薦與裴滿餘慶消幹忠正臣所不及召爲太府監改刑部侍郎十九年命徙按山虎等八猛安自河南置大名東平之境還爲大理卿熙宗在位命參酌隋唐遼宋律令以爲皇統制條海陵率意改革詔更定之槪取皇統舊制及海陵續降通類校定通其窒礙略其繁碎有例該而條不載者用例補之特闕者用律增之凡制律不該及疑不能參決者取旨畫定凡特旨處分及權宜條例內有可常行者收爲永格其餘未可削去者別爲一部凡千一百九十餘條爲書十二卷上奏詔頒行之賜銀幣有差項之攝御史大夫撻徙山東

猛安八謀克于河北東路置之酬幹青狗兒兩猛安舊居之地
詔年牛耕者買牛給之數月改御史中丞兼同修國史累遷州
吏二部尚書尋改大典尹所治甚善駕幸上哀皇太子居守使
人論以將有春水之行當益勤乃事選以所獲賜之有疾遣醫
診視駕還以爲西京留守改臨洮尹卒

移刺子敬字同文本名屋骨孕魯遼正院人曾祖霸哥同平章
事父拔魯爲都統臬准備任使官會克中京留督輜重囚被掠
白髡逃于山林子敬讀書好學博通古今皇統間囚修遼史辟
爲祿屬史成除遼州同知故事本廳占地歲入數百貫州宮取
爲常例子敬竟却之秩滿郡人請留天德三年入爲翰林修撰
遷禮部郎中正隆初詔監諸將巡邊軍帥遣以函獲同行官僚
皆受獨不敢取海陵嘉之入見語以汝家貧而不苟待凡取者

皆沒入官其後詔子敬宴賜諸部論之曰凡受道例道宰臣陰以前能移職故特命汝使還遷翰林待制大定三年詔同修國史選往撫窩幹餘黨時敬居諾猛安謀克及州縣漢人中編令宜諭無以前時用兵挾仇廢害還改秘書少監兼修起居住常召入侍便殿講論古今及時正利害或至夜半時宋清和來書言海陵取于采石彼按兵不虜俾全師而還宋人自來以浮辭相欺回背宜以理折言往者大軍若果渡江宋國境土今何在也庶幾彼以詭詐我以誠實俄遷右諫議大夫從幸西京州縣官入見猛安謀克不得隨班奏言軍民一體合令隨入上責讓宜徵及端午朝會詔依所奏行之又言山後四外佩地大廣有妨百姓耕墾亦分以與民尋擢秘書監轉簽書樞密院事同修國史出爲河中尹請老改與中尹民感其德徒咸平廣寧尹二

十一年致仕卒于家年七十一子敬為人好施予又惡非其道者完顏元宜方爲相時索其良馬不與後致仕乃以贖行所得俸賜并使宋禮物皆散之親舊卒後家無餘財其子質宅以營葬事

高松本名檀柔與閭山俱澄州折木人年十九從軍爲蒲葦有力善賦宗弼聞其名召置左右從破汴京及和尚原累官咸平總管判官世宗卽位充管押東京路渤海萬戶兵部尚書可喜與李老僧有舊欲誘與可喜謀反老僧約松同舉事衆謂必得此軍舉事無難老僧嘗爲神翼軍總管有兩銀牌尚在可以矯發內藏賞軍老僧亦自負松必見聽及是見松說以君有功舊人何以至今不得大官松曰我一縣令每念聖恩累世不能報尚敢有他望乎老僧遂不敢言已發覺俱敗松後從征窩斡以

功遷咸平少尹至崇義軍節度使卒年七十四高閭山初避
充護衛調順義軍節度副使轉唐括移刺都札詳穩歷震武軍
節度副使曹王府尉大名治中汝單二州刺史在任好用大杖
反笑時禁不依法用杖決人者以爲難行俄坐決死部民楊仙
削官解職降鳳翔治中復歷原濟泗三州刺史改鄭州防禦使
遷蒲與路節度使移臨海盤安寧昌三軍貞祐二年元兵徇懿
州城破死之

高竑渤海人以蔭補官累調貴德縣尉提刑司舉在繁劇遷奉
聖州錄事察庶轉內黃令入爲左藏庫副使元妃李氏以阜幣
易紅幣獨拒不肯奏於章宗大喜遣人諭以所執甚善今姑與
之後不爲例累轉儀駕局少府少監戶部員外郎出爲安州刺
史大安中召傅越王永功王判中山命同知府事改河南大名

府同皆兼本路安撫使貞祐二年遷河北西路按察轉運使錄
大名功遷三官致任興定四年卒

弘簡錄卷二百四十終